

謝

獻

疊

醜

山

集

集



獻

醜

集

許
棐
集

中
華
書
局

叢書集成初編

謝疊山集（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘二〇九二毫米三十二分之二

統一書號：一七〇一八·一五一

獻醜集

宋 許 棻 集

閨女弄妝，自謂天下色也。出見施嬙，始知獻醜。予以詩文獻醜者也，自重痛之餘，戶外事一不以綴意。獨嗜筆硯，如奇聲美味，每有題著，必拊几嗟賞，謂言語天出，不知前有古人。今有作者，及示人人，傳以爲笑，始悔不藏之也。然則醜可廢乎？曰：不可。安知不有窺而笑者哉？抑笑可禁乎？曰：不可。禁笑則愈笑也。與其藏醜而人窺笑，禁笑而人愈笑，孰若獻醜之笑之爲快也。故氏其集曰獻醜。嘉熙丁酉中秋日，梅屋許棻自序。

梅屋記

予小莊在秦溪極北，屋庫地狹，極南別築數椽，爲讀書所。四簷植梅，因扁梅屋。丁亥震凌，屋仆梅壓，移扁故廬。客顧扁而問曰：昔吟逋愛梅，未嘗一日去梅。爾愛梅無梅，屋扁梅屋，猶飢人食餅，奚益？請去扁。予曰：向也以梅爲梅，今也以心爲梅，扁何問焉？扁可以理觀，不可以物視。片木二字而已。理觀四壁天地萬卷，春風，庾嶺香，孤山玉，豈襟袖外物哉？斷斷以爭其無喋喋，以街其有，皆非物理之平也。請別具隻眼。客曰：唯。

瘦木文

溝中之斷。僕取爲薪。斤斧將奏。予止而哀之曰。女巢鳳凰者乎。棲鷗梟者乎。傲歲寒而蒼翠者乎。媚春光而紅紫者乎。何桶杙不齒。輶輻不錄。而泛泛水中。爲不剡之舟乎。使造化者完女根株。布女枝葉。復生於仁壽之域。或使匠氏斲爲瑟琴。文爲犧象。不朽於禮樂之鄉。女欲之乎。木以臆對曰。天地一紅爐也。古今一燄光也。堯桀同埃。孔跖共燼。豈獨予可哀而爲是拘拘者哉。請蠹之。予不忍。瘞于後圃。贊且識曰。出乎是。反乎是。與焚溺異。木乎木乎。超生死類。

朱黃二君說

二君朱黃二筆也。阿阿膠也。

阿丈人揖朱黃君而問曰。吾膠漆二友。爲梅屋校讎有功。請各第而言之。黃君曰。辭訛理舛。非我莫攻。黠謬畫差。非我莫蓋。且中央色也。當受衆采北面。朱君赭容奮髯而怒曰。句讀我判。四聲我分。又文之美惡。我標我準。實破暗之燈火。拯謬之丹砂也。彼雌其名而不雌伏耶。阿丈人評之曰。朱君事業。果赫赫滿人目。然頻濯髮者易禿。苦用心者早衰。外澤顏色者。內未必無枯槁之疾。黃君曰。然。請書爲主人養生之鑒。

海鹽廣福永爲賢首教院記

竹軒住廣福之明年。榛蕪芟夷。廊廡環接。學袍鱗萃。慈像金鮮。復舊觀之漸歟。一日。偕知寺淨喜來白梅屋居士曰。君與寺鄰。吾爲君友。壞梁又有而祖監丞題墨。前因後緣。如此不絕。敢有請焉。廣福賢首道場也。彼宗連住二三十年。教異事殊。隨葺隨毀。更久燕雀亦無容身地矣。吾持此教居此寺。是客去主歸時也。一身當百廢。不敢不勉。第恐主席未煖。客單已侵。主退客留。寺興廢未可知也。淨喜援郡利真如故事。

聞於禮部。部然其然。符郡。郡帖縣及寺。一邑官吏士民。又莫不然其然也。欲鑲帖以照來者。予爲我證明。居士曰。萬物興廢有數。而況寺乎。寺當廢。八萬四千母陀羅臂。不能扶其毀。當興。九十五種外道心。不能害其成。今寺廢數極。數極寺興。如冬株剝落。春陽必回。華孕芳舒。客寒不能遏也。然則華嚴世界。不從天隊。則自地湧。又其不然。舍金雲委。施力川增。衆妙混成。自然愜當。是時和尚趺坐一席。戒水澄源。慧燈輻焰。無佛無祖。天地一塵。昔未來。未嘗不來。今未去。未嘗不去。非來非去。是名常住。是帖也。何必刻。淨喜曰。石已具。姑刻之。

梅屋書目序

予貧喜書。舊積千餘卷。今倍之未足也。肆有新刊。知無不市。人有奇編。見無不錄。故環室皆書也。或曰。嗜書好貨。鈞爲一貪。貪書而飢。不若貪貨而飽。貪書而勞。不若貪貨而逸。人生不百年。何自苦如此。答曰。今人予不知之。自古不義而富貴者。書中略可考也。竟何如哉。予少安於貧。壯樂於貧。老忘於貧。人不鄙夷予之貧。鬼不挪揄予之貧。書之賜也。如彼百年。何樂之有哉。書目未有序。童子志之。

送張南銜序

南窗張君。鴈山片玉也。一日抱琴過我。酒三行起而辭曰。梅屋。吾與琴相好。江湖二十年。程山行水。不外一日。弄月驛涼宵。雪店寒曉。手不釋弦。弦亦不釋手。但未能如阮千里無貴賤。長幼使之彈。而無忤色也。將卜居西湖。與琴終老。因過予以獻一曲。曲曰。抱琴來兮。鴈山低。抱琴歸兮。鴈山崔嵬。卜居兮。西湖之厓。

身伯牙兮心子期。予謝之曰。人琴俱清。又居西湖。孤山之梅添香矣。他日予到西湖。見鷗鷺當門。花竹繞屋。而中有琴聲者。必君之居也。訪君。君罷琴而接之乎。

融春室記

予多病畏寒。未冬爲縮殼蝸矣。陋室第三桁下分立四榻。中垂一簾。對懸樂天東坡二先生像。當窗晴日。煖飢骨暢柔。壚溫火深。神氣和浹。未信天地間別有春也。嗚呼。室舊室也。歲殘歲也。何昨也。冬而今也。春。吾疑二先生在焉。霜雪不敢犯。又疑葉葉春風。自書卷中流出。不然。是造物者憐我寒癯。異令於一室也。然不敢私一室之春。願融而爲天下之春。貧褐富裘。同一溫。曠家居客寓。同一熙。臺此予之心也。二先生之心也。

王文書目序

王文以書謁。而貌有羸色。予問其故。對曰。文載書自杭而湖。自湖而秀。村桑郭滯。日引月長。舟不減輕。囊不增重。蠶飽而人飢。別圖什一之利而未忍。不獨貌羸。心亦凋矣。予曰。女書不售。他利可圖。士不讀書。無業可振。況當天子與太平。以詩書化天下。天下之士。方鮮醒陋目。剗銳怠心。吾見家韓檠而戶鄒架。爾羸然之貌。爲欣然之色矣。姑小待。

賣井文

夏五小旱。井無剩泉。予俯睨而責之曰。吾謂女炎夏涵冷。凜冬抱溫。不趨其時者也。朝飄冰澄。暮鼎玉溜。

不易其操者也。今衆源猶活，爾泉獨枯。泄寶塵積，登繞煙生。始悔知女者淺，期女者之太深也。予事休炊，息飲，誓不屈耿恭之膝，言訖，倦爾而睡。見童子蓬頭土面，焦唇燥吻，喁喁而告曰：「吾井神也，使爾釜不生塵，衣不凝垢者，誰乎？」使爾筆硯津津，濡雲染霧，樟檮醺醺，泛月浮花者，又誰乎？久濟亡功，一渴成怨，何少恩耶？當扣天關，開泉戶，償子無窮之汲，覺不知其所之，但聞西簷之雨。

送教上人序

人不游學，自塗耳目者也。士而游學，渺渺江湖，寥寥師友，何處非重費哉？故以貧塗耳目者，十常八九。僧天地一刹也，聞鍾展鉢，望塔投師，安有士之一費？如是而不游學，守巢鳥耳，鄉僧修教讀智者書，參皎然，靈一句法，又飛錫驚峰，目書外之書，耳句外之句，離山出海之龍象，歟？驚峰予舊吟行之地也，老矣不能侶馳，作送行序。

樵談并序

樵，身也，談，心也。向月礪雲崖，和樹聲，答泉響，高亦可，低亦可，繁亦可，簡亦可，猿鶴不猜，鹿豕不忌，忍饒舌者，語世人；世人笑之耳。世人不談王道，樵亦能笑之。

耕堯田者有水慮，耕湯田者有旱憂，耕心田者無憂無慮，日日豐年。

擘書覆瓿，裂史黏窗，誰不惜之？士厄窮途，落冤穽，聞者不憐，遇者不顧，聽其死生，是賢紙上之字，仇腹中之文，哀哉。

與邪佞人交。如雪入墨池。雖融爲水。其色愈汙。與端方人處。如炭入熏爐。雖化爲灰。其香不滅。小人出事剝竊。入事熏修。是攘雞養神。攫金妝佛。神佛其據我乎。

逢彼躁忿。如塗雪著面。而易融。逢彼笑怒。如隙風侵肌。而不覺。

子怨父貧。兄攘弟富。妻妾視豐儉。爲悲憤。奴僕視盛衰。爲勤怠。市道不在門外矣。

殺人者死。定法也。酷吏殺人不死。謬將殺人不死。庸醫殺人不死。法定乎。

凶人祭祀。吉神不變。如君子不受小人之苞苴。吉人祭祀。凶神不臨。如小人不登君子之俎豆。

聞君子議論。如墮苦茗。森嚴之後。甘芳溢頰。聞小人諂笑。如嚼糖冰。爽美之後。寒沍凝腹。

或問優孟學孫叔敖。抵掌談笑。歲餘與叔敖無辨。今人終身學孔顏。何百不一如。曰。心學滑稽易。口耳學

聖賢難

盡工數筆。術者片言。僧道一經半呪。勸得千金。文士剝精銚心。不博人一笑。吁。士也賤。何獨在茲。攜魚上砧。送蟹入釜。無不惻然。及坑才陷藝。惟恐不深。是不忍於細而忍於大。

鬪金閱玉。不幸甚矣。而先人手澤。亦卷分帙散。永爲不全之書。是遭無饒之秦也。哀哉。

貴蓄孔鸞。賤視賓客。肥飼猿鹿。瘦役輿臺。不義而富貴者之積習也。

衣垢不滌。器缺不補。對人猶有慚色。行垢不滌。德缺不補。對天豈無愧心。

古人歎未知爲人父之道而有子。今人未知爲人子之道而有子。

庸匠誤器。器可他求。庸婦誤衣。衣可別製。庸師誤子弟。子弟可復胚乎。

龍有蛇之一鱗。不害其爲靈。玉有石之一脈。不害其爲寶。士有百行。一行偶違。不害其爲君子。自己之僇。眞僇也。不求眞仙。而求繪鍾塑呂。惑矣。

堯行舜趨。周冠孔裳者。恐未可以貌定也。使其見遺金於曠寂之途。遇色婦於空閑之室。而一不動心。是堯舜返魂。周孔復肉。不然。仁義之賊也。

或問浮屠氏以身爲旅伯。何必殫費金朱。華耀土木。曰。小人性貪。非窮奢極侈。無以起其信心。君子對青天而懼。聞雷電而不驚。履平地而恐。涉風波而不疑。

讀孔孟之書。而不嗜殺人者。未爲仁人也。讀孫吳之書。而不嗜殺人者。仁人也。

東家富財。車馬接踵。西家富德。風雪閉門。

燕處文梁。壘深鷁煖。鳩棲弱葦。巢折身危。蕭曹得其託。勳成烈就。慶衍後人。且增失其託。義破忠殘。餒貽先世。然則劉季豪傑之文梁。項羽英雄之弱葦也。

上交之難甚矣。百諂未必喜。一忠刻骨怨之。百巧未必錄。一拙終身弃之。所以古人高尚其事。虎不食虎人食人。虎不食于人食子。哀哉。

破爪傷膚。壞梳摘髮。色爲之變。衆珍瘞身。列艷靡骨。心爲之安。

倚富者貧。倚貴者賤。倚強者弱。倚巧者拙。倚仁義。不貧不賤。不弱不拙。

天不能家訓戶飭賢一人以誨衆人之愚。天不能家贍戶給富一人以濟衆人之貧。非以賢私一身富私一家也。

瘖犬說

別墅二犬。一犬瘖廢。羣佃交議曰。職吠者無聲。當與不鳴鴈俱死。予召而喻之曰。夫瘖於聲者。未必瘖於心也。是畜呼之而來。叱之而去。不瘖於進退者也。賓戚升堂。嚙而迎之。遼人過門。哆而逐之。又不瘖於覲疎者也。視夫衛輒吠父王莽吠君。管象吠兄弟。怒聲徒嘈嘈於天下後世耳。爾不原其心。而鳴者生。瘖者死。是冒持聽衡。謬操刑柄。生者幸而死冤矣。羣佃相視而歎曰。吾儕瘖於心者也。念不到此。敢不與是畜俱生拱而退。